

**Sagi tə, ba nə púpúní ba pa
Ebərə
Kərisə lià tə nə
Ebərə-ba sagi tə yuu wa sugu**

Lìù tə, v nə púpúní sagi kv tə

Lìù mama yèrì liù tə, v nə púpúní sagi kv tə. Yá liù tə, v dàn nə púpúní kv, yi *Zwifə, v nə jigə *Kərisə liù. U yèé Yı saga nədwara tə zəni zəni, v ga yèé *Gərekə-ba yìèn zənzən.

Lìà tə nə, v nə púpúní

U púpúní kv v pa *Kərisə lià tə nə, ba nə zén ba yi *Zwifə-ba, ba vànà yà nə gwàrì, ba wa lià duən tətə yà nə pià ba dugu Yı cwəŋə tə.

Sagi tə wa sugu

Nəŋə kv tə yırı, v nə púpúní ba nə: *Kərisə lià təntə yà tə wà kàrì tə, tə nə pın diàn zənzən, dèń nì, kv pa, ba vànà gwàrì.

Lìù tə, v nə púpúní sagi tə, dàn kàrì ba, sə ba lwarì kv tə nə yi Zwezi cígá cígá. U bırı ba də, Zwezi-Kərisə cıci nə yi Yı nimardun tə *jɔŋwanu. U mù nə yi liù tə, v nə wulə Yı də ləzoni pwərə wa, v kwen ba. U cígá yi ləzwənə, v cígá ga yi Yı də. U tıga dagarv tə yuu wa, v ma fwa *jɔŋi, kv nə pın won mama nii sú.

Síún nə, nə kúè ba jwəŋə duən pià. Nə mama twá də Zwezi-Kərisə nə wáá Yı yıra nə boli, fən ga ba nəba jə. Lìù tə, v nə púpúní sagi kv tə pià, sə v dàn Ebərə-ba jìàn. Mə kv mù nə pın, v tì

Yü nimardwan tə wa là tə, ba nə dí yáá ba kə ba waa Yü nə, v ma maŋa v bırı ba. U kwè ba, sə ba yá ba tiàn Zwezi jün wa, v nə yi liù tə, ba nə wàá v nə ba twá ba janı pínú wuuu, ba dän ká pìi ba kə ba kwa càn wa.

Yü twá v biù Zwezi-Kərisə tə nə, v ma swìn nə con

(Zwan 1.1-14; Kolosə tiàn 1.15-17; Eberə-ba 10.12-14; Filipə tiàn 2.6-11)

¹ Dí yáá nə, Yü twá v nii *sùsùnà tə nə, v ma swìn nə nıbara-ba con, nəε kapuvu. U twá conı yirə yirə də nə, v ma swìn ba con. ² Síún nə, Yü dän twá v biù tə nə, v ma swìn nə con nə, zèn máŋá kv tə wa. Yü twá də v mù, v ma fwa luv, Yü ga li wá v tún, v ga tún máŋá də, sə v pa v tunı wiən tə mama. ³ Yü twá v biù təntə nə, v pa v dun tə pıplı. U mù nə yi Yü nyınyıga cígá cígá. U nii sugv jə dıàn. Kv twá kv mù sugv təntə nə, v ma pa luv wiən tə mama zıga tə bwálá nə. U mù nə sın ləzoni cuna, v li ba yuu wa. Kv kwa nə, v dıga Yü sán nə, v jèé Yü jızən* vàn nə, v dé pàrì də Yü tə, v nə yi pìú nəfarv, v wulə tə mə yuu wa.

Zwezi-Kərisə dwə malıke

⁴ Kv mù biù təntə jə dun, v donı *malıke. Kv twá nətv, Yü ma pa wá yırı, kv nə dwə malıke yırı. ⁵ Kv yi cígá, Yü tə wà malıka con swìn, v wú:

«À pìà à bırı də, n mù nə yi à biù. Zèn kv tə, à mù Yü nə yi n nyına».

* **1:3** 1.3 Ka jèñ pìú jızən vàn nə yi dun bwálı.

Yü ma kúù wà malika con swìn, v wú:

«À mù wá yà n nyina. N də ga wá yà à biú».

⁶ Yü nə kúù pın ba luri v tətən biú tē tia yuu wa, v swìn v yoo, v wú:

«Malika mama mə, sə ka bà ka pa wá dun».

⁷ Á nəhə, ku tē Yü nə swìn malike tē yuu wa. U swìn, v wú:

«Malike tē tɔŋa tē pın nə. Tə yi ndə voo nə, tē ga yi ndə mənvoo də nə».

⁸ Yá Yü dān swìn v biú tē mù yoo, v wú:

«N yi Yü, yá n ga wá yà piú wuu, ku máŋá nə ba zwèe. N wá dé pàrì n là tē yuu wa, cígá cwəŋə wa. ⁹ N swə won tē, ku nə tì cígá cwəŋə, n ga culi ku tē nə yi yokokwɔn. Mə ku mù nə pın, n *Yuu-Tiu kúrí n mù, v pa v tìàn nə. U kúrí mú, v lwá pupwən nuɡa† n yuu wa, sə v pa n ya piú. U sóní, sə v kúrí mú, v ga yá n dabara».

¹⁰ Yü tē kúù swìn, v wú:

«Ku jju mama wa, ku yi n mù Yuu-Tiu nə fwa tia tē, də lanworu tē də n jìàn. ¹¹ Tə wiən tē mama wá jén lá. Lanworu tē də tia tē wá kwɔn, ndə gànù nə kwɔn nətu. Yá n mù ga wá yà lá wuu. ¹² N wá pəpəni tē ndə liù nə pəpəni v gangwɔv, v dɔɡv vàn nə. N ga wá lwàń tē yuu nə də lanworu nədɔn, ndə liù nə lwàń gandvra. Yá n mù wá yà nətu wuu, n bá lwàń mama, n mu bá zwèe».

† **1:9** 1.9 Yü nə kúrí liù, sə v ya piú *Yızərayelə là dwí tē wa, ba yáá lwé nuɡa v yuu wa, sə ku biri də, v yi Yü nə kúrí.

13 Yü tə wà malıka con swìn, v wú:

«Bàá yəbə n jəñ à jızən vən nə, də à ma kəni n duŋa n nəe dəñ nə».

Yá v swìn ku nətʋ v biú tə mù con. 14 Yá malıke tə mama yı siŋə, tə nə tɔŋa, tə pın Yü nə. Yü yáá tun tə, v pa, tə saŋa là tə nə, ba nə me, sə v jon ba, v kə mu wa, ku nə ba zwèe v con.

2

Yü jon nəba nə cuna wa (Eberə-ba 4.1; 12.25)

1 Yü twá v biú Zwezi-*Kərisə nə, v ma swìn nə con. Ku mù nə pın, nə me, sə nə zùrì nə yıra zənzən də sùràn tə, nə nə nì. Ku nə tà ku mù, nə wá dwá cwəŋə. 2 Sɔgv tə, Yü nə twá *malıke tə nə, v ma swìn, ku sɔgv təntə jə dəñ zəni. Là duən wà ku nii zílí, ba ga wà ku nii nə twá. Yü pın, càn yí ba mù là təntə mama, sə tə mù nə ya ba ŋwírán, ba nə vıga tə yırı. 3 Nə mù yı, Yü twá v biú tə tətə nə, v ma swìn nə con də, v wá jon nəba nə cuna wa. Ku pìà ku bırı də, nə də wàrì nə jén càn tə yáá nə, də nə nə vıga, sə nə zílí sɔgv təntə nii, ku dun nə dwə malıke tə sùràn tə. *Yuu-Tiu nə təntən v swìn də, Yü wá jon nəba nə cuna. Ku kwa nə, là tə, ba nə nì ku sɔgv təntə yoo, ba də kúð sùrí lá nə, ba bırı nəba, ku dun nə yı nətʋ. 4 Yü tətə twá v diàn mımınan nə, də tutunan yirə yirə, tə nə bırı v diàn, də yomılan nə, v ma bırı də, ba sùràn tə yı cígá. Yü tə kúð twá v *Siŋu tə tarpınan tə nə, v ma bırı ku yoo təntə, ku twá v fıra tə nə.

Zwezi tıga lià mama yırı
(Filipə tián 2.6-11; Galasi tián 4.4-5; Eberə-ba
5.7-10; 4.15-16)

⁵ Nə yi luv, ku tə nə biàn, tə yoo nə swìn. Yu wà diàn pın *malıke nə, sə tə mù nə tını ku luv təntə. ⁶ Yá ku dån kúð púpúnı Yu sagı tə, bwálı don nə, ku wú:

«Ləzwənə yi bəeəe, sə n ma buja v yoo? Bəeəe nə v yi, sə n ma ywàǵá v yuu? ⁷ N pın v mun máǵá mancın wa malıke yáá con. Ku kwa nə, n pın v na dun də zilé, ndə ba nə pın dun piú nə nətı. ⁸ N ken wiən tə mama v neə dən nə».

Yu pın, ləzoni jə diàn wiən tə mama yuu wa. Ku nətı dån pın, Yu wà won mama yá kwa, ləzoni nə ba diàn jə ku yuu wa. Yá də ku nətı me, nə na zəni də, ləzwənə tə ba diàn jə wiən tə mama yuu wa síún nə. ⁹ Á nəjə ku tə, nə mù na: Máǵá mancın wa, Yu mun Zwezi malıke tə yáá con. Yá síún nə, v dån yi dun də zilé tíú, v nə dí càn v ti tə yırı. Ku twá Yu pubwanı tə nə, Zwezi ma ti luv ləzoni mama yırı.

¹⁰ Yu nə fwa luv, luv ga yi ku wulə v mù yırı. Yá v ga pià, sə v bia tə ya dánı, ba twá, ba zu v dun tə wa. Ku yi Zwezi nə wá jon ba ba cuna wa. Yá Yu dån yà me, sə v pa v dé càn ndə ləzwənə nə, sə v ma wànı v tun ku tutuı təntə, sə v ma pa v ya liù tə v yoo mama nə ziən, ¹¹ Zwezi nə sın ləzoni cuna v li. Ku nətı dån pın, v mù də lià tə, v nə sın ba cuna tə v li, mama nyına dån yi nədı. Mə ku mù nə pın, cavıra ba wá jə, sə

υ ja ba υ boηə υ nubia. ¹² Μάηά don wa, Zwezi swìn Yυ con, υ wú:

«À wá swìn n yiri tə yoo, à biri à nubia nə. À wá nun á bu n yiri tə nə, n púlí tə tətəñi wa».

¹³ Zwezi tə kúò swìn, υ wú:

«À mù, à wá kə à waa mama Yυ nə wuuu».

U tə swìn, υ súrí lá nə, υ wú:

«Á nəηə à mù də à kwa lià tə, Yυ nə pın nə».

¹⁴ Ba lià təntə με yι ləzoni, ba nə jə yira də jana. Ku mù yiri nə, Zwezi-Kərisə də jigə ləzwənə ndə ba nə. U fwa ku nətu tə, sə υ ma wàní υ twá tian nə, υ ma cùgù liù tə, υ nə jə tian diàn υ juun wa. Ku tíú nə yι *Sítana. ¹⁵ Lià tə yà yι ndə ywəηə nə ba luv wulu mama wa, ba yà nə dəri tian fən yiri. Zwezi tian tə dàñ pın, ba jon ba tiàn. ¹⁶ Ku dèñ nə yι, Zwezi tà υ twi, sə υ san malıke nə. Ku yι υ twi, sə υ san ba tə nə yι *Abərahəmə dwíí tə wa lià nə. ¹⁷ Ku mù nə pın, υ yà με, sə υ nyın də υ nubia tə, ba won mama wa. U zıgı nətu, υ ma jì *jonwana yun tiàn nəkwıa, υ nə dəri lià yinəgə zənzən, υ ga sèe υ tuηa, υ pın Yυ nə, ndə ku nə με nətu, sə υ pa, Yυ sèe υ sın luv lià mama cuna, υ li ba mù də wá pwərə wa. ¹⁸ Cígá, Zwezi tətə dí càn. Ku yι máηá tə wa, Sítana nə dédén, sə υ yugə wá, υ pa υ tun yokukwıun. Ku mù nə pın, υ mù dàñ wàá υ saηa lià tə nə, Sítana nə yugə ba də, sə υ pa ba tun yokukwıun.

3

*Zwezi-Kərisə dwə Moyizə
(Matıə 21.33-38)*

¹ Á mù, á nə yɪ à nubɪa *Kərisə yɪrɪ, á mù lià tə, Yɪ nə kúrí aba, sə á ya Kərisə nə tɪ, á buŋa Zwezi yoo. Yɪ lɪ wá v tɔn, sə v ya nə Yɪ *jonwana yun tián nəkwɪa. Yá nə dàń swìn v yoo nə bɪrɪ, də nə kəni nə waa Yɪ nə wuuu. ² Máŋá don wa, *Moyizə yà sèe Yɪ *nii tə də pùé nədu, v tɔŋa v pɪn Yɪ lià tə nə. Zwezi də fwa kv nətu, ndə Moyizə nə. U sèe Yɪ nii tə də pùé nədu, v tɔn v pa Yɪ lià tə nə. ³ Kv yɪ cígá, liù tə, v nə lwè diè, v mù nə jə dun, v doni diè tə tətə. Zwezi nə yɪ ndə liù tə nə, v nə lwè diè tə. Kv mù nə pɪn, v na dun, v doni Moyizə. ⁴ Diè mama jə ka dilòrú. Yá liù tə nə lwè wiən tə mama, nə yɪ Yɪ. ⁵ Máŋá don wa, kv nə kèeń, Moyizə mù yà sèe Yɪ nii tə də pùé nədu, v tɔn v pa Yɪ lià tə nə. U yɪn tɔtòndò, yá v ga yɪ liù tə, v nə mɛ, sə v swìn kv tə, Yɪ nə wá swìn tə, v bɪrɪ lià tə nə. ⁶ Zwezi-Kərisə nə yɪ biù tə, v nə ywàŋá v nyɪna Yɪ diè tə yuu nə. Nə mù, nə yɪ Yɪ diè təntə, də nə nə sèe, nə zɪgɪ diàn, nə kə nə waa v nə wuuu, ya nə ga pɪn wá dun yala tə yɪrɪ, v nə pɪn nəba.

*Sìé wulə Yɪ con
(1 Korentə tián 10.1-12)*

⁷ Á mù dàń yɪ Yɪ lià. Kv mù nə pɪn kv yɪ, ndə Yɪ-*Siŋu tə nə swìn, kv wú:
«Zən kv tə, á mù nə nì Yɪ sugv tə, ⁸ á dàna ká fwa zɪbaniun. Á dàna ká fwa ndə fuən tə nə, á nɪbara-ba nə zàn, ba vɪ Yɪ nii, kasoo lanworu* tə wa».
⁹ Yɪ swìn, v wú:

* **3:8** 3.8 Kv yɪ *Zwifə-ba dwíí tə, kv nə nan yongav, kv vəli luv nii tə wa, Yɪ nə pɪn kv.

«Ku dùn tè nè, á nùbara-ba pìà à nii nè, sè ba jén ku tè, à nè wá fwa. Ba ga yi là tè, ba nè nu à mù Yu tutunan nè yi nètù, bina sapwilè. ¹⁰ Ku mù nè pìn, à lɛɛ ma zàn ba mù là tè yuu, à ga swìn, à wú: «Ba pubɔɛtì vèvèrì, tè yá nè wuu, ba ga ba sèe, ba twá conì tè, à nè bìrì ba.» ¹¹ Ku mù nè zìn à lɛɛ tè, à ma dù, dè ba bá zù à sié bwálí tè wa, à nè tanì, à tún ba nè».

¹² À nubia-ba, á cia á tìàn nè. Á wa liù nèdu mama wà mɛ, sè v ja pubɔɛnwán v waa con, ku nè pìn, v ba Yu nii sèe, v ga vèvèrì v yá Yu tè, v nè wulè mu wa. ¹³ Dùn mama ku nè zigtì jju ku vèli dèdèni, á kwìè duèn mánjá mama, ba dàn ká wànì á wa liù mama, ba gɛgarì ba pa v tun cuna, tè nè wá pa v vɛ, sè v zìlí Yu nii. ¹⁴ Nè ken nè waa Zwezi-*Kèrisè nè, nè ga jè ku tè nè, nè yà nè jè ku jju mama. Yá nè nè jin ku nè zèni, ku ja va ku yígúré, nè wá na torì dè Zwezi-Kèrisè. ¹⁵ Ku púpúní Yu sagì tè wa, ku wú:

«Zèn ku tè, á mù nè nì Yu sugv tè, á dànà ká fwa zɔbaniun. Á dànà ká fwa ndè fuèn tè nè, á nùbara-ba nè zàn, ba vɛ Yu nii nètù, mánjá don wa».

¹⁶ Bèré nè nì Yu sugv tè, ba ga zàn ba zigtì Yu nè? Ku yi là tè mama, *Moyizè nè pìn ba nan *Ezwipètè tè wa. ¹⁷ Bèré yuu wa nè Yu lɛɛ zàn bina sapwilè tè mama wa? Ku yi, tè zàn là tè yuu wa, ba nè fwa cuna tè. Ba mù là tètè, tɛga kasɔ lanworu tè wa. ¹⁸ Yu dùè dùrè, v wú: «Ba bá zù à sié bwálí tè wa, à nè tanì, à tún ba nè». Bèré yiri nè v dùè ku dùrè tètè? Ku yi là tè

yiri, ba nə wà v nii sèe. ¹⁹ Nə cígá nı də ba wà wàní ba zv Yıı sié bwálí tə wa, ba nə wà ba waa ken v nə wuuu tə yiri.

4

(Eberə-ba 10.35-39)

¹ Yıı kàn nii v pa nəba də, nə wá zv v sié bwálí tə wa. Kú nikanı təntə wulə də zən mama, kú pa nə də nə. Kú mù tə yiri, nə dāń zurə nə yira síún nə, sə á wa liú mama dān ká mé kwa. ² Ba swın Zwezi-Kərisə suywáńú tə, ba bırı nəba, ndə nətı tə nə, ba nə swın kú, ba bırı nə nıbara-ba nə. Kú sugı tə, ba nə nı, wà won fwa kú pa ba, kú máńá tə wa. Ba nə nı kú, ba wà kú sèe, ba wà ba waa ken Yıı nə. ³ Nə mù con, nə mù ken nə waa Yıı nə wuuu. Kú mù nə pın, nə wáá Yıı sié bwálí tə wa, nə zwı. Yıı swın lià tə, ba nə wà ba waa ken v nə tə yoo, v wú:

«À lıńa zàn ba yuu wa, à ga dù də, ba bá zv à sié bwálí tə wa, à nə tanı à tún abada».

Yıı tun v tutınan tə v zwèe, halı, kú nə zıgı lıv dèń lańı máńá wa. ⁴ Kú tə púpúnı, kú swın Yıı sagı tə wa, dıan barpe nii dıın tə yuu wa, kú wú: «Yıı zwèe v tutınan tə mama dıan bardı nii nə, v ga sıı dıan barpe nii dıın tə nə».

⁵ Yıı sagı tə bwálí don də wa, Yıı kúv swın, v wú:

«Ba bá zv à sié bwálí tə wa, à nə tanı à tún, abada».

⁶ Kú dāń pià kú bırı də, lià duən mù wáá Yıı sié bwálí tə wa, ba zwı. Yá təntən lià tə mù bá zv Yıı sié bwálí təntə wa, ba nə nı suywáńú tə, ba ga wà kú nii sèe tə yiri. ⁷ Kú mù nə pın, Yıı tə

ma pîi v li dıın. U bonjə kv dıın tə <zən>. Yá v dān kúv twá də pıú *Davidə nii, v ma swın, ndə kv nə dí yáá kv púpúní Yıı sagı tə wa fuən fuən, kv wú:

«Zən kv tə, á mù nə nı Yıı sugu tə, á dānà ká fwa zıbaniun».

⁸ Á yəé də Zwozuwe yà nə ja *Yızərayelə lià tə, v ja zv luv nii tə wa, Yıı nə kàn nii, sə v pa ba. Yá kv ga tà, kv mù nə yı sié bwálí tə. Kv mù nə pın, Yıı tə ma swın dıın don yoo, kv kwa nə.

⁹ Kv nətv pıà kv bııı də, sié dıın don tə wulə, kv pa Yıı lià tə nə. Kv sié dıın təntə yı ndə dıın barpe nii sié dıın tə nə, ndə Yıı tətə nə tvn kv nətv. ¹⁰ Liù cígá nə zva Yıı sié bwálí tə wa, kv tíú də yáá sıı v tvıınan jıın wa, ndə Yıı nə sıı nətv. ¹¹ Kv mù nə pın, nə dān bıbara, nə zv kv sié bwálí təntə wa, sə nə liù mama dān ká ya ndə Yızərayelə lià tə nə, ba nə wà Yıı nii sêe, kv pa ba dugv Yıı cwənjə tə.

¹² Yıı sugu tə pın mıı, kv ga jə dıàn. Kv goııi zəni kv doni lagurı sıú, kv nə jə níé bələ. Yıı sugu tə də nəba kv zwı, kv janı nə bıcanı nə də nə kurən kənə nə. Kv mù nə yáá bıırı kv tə, ləzwənə nə pıà, sə v fwa, də kv tə, v nə bıııa v waa con bıırá. ¹³ Won tələ, kv nə sègə Yıı yáá nə. U na wıən tə mama, v nə fwa, v yıá yuu nəpon nəpon. Mə, v mù yáá con nə, nə wá tın nə nii.

*Nə fàrá nə yı Yıı yıra də nə waa mama
(Eberə-ba 9.11-12, 24; 10.21-23)*

¹⁴ Nə jə Yıı *jonwana yun tíán nəkwıa. Kv tíú tə nə yı Zwezi, v nə yı Yıı-Bıı. U mù nə vəli v yı Yıı yıra. Yá nə dān swın v yoo nə bııı, də

nə ken nə waa Yui nə wuuu. Ku m̀ nə pın, nə zıga diàn, nə dàn ká pıi nə kə nə kwa. ¹⁵ Nə jə Yui jonwana yun tiàn nəkwıa, yìèn nə dódón wá zənzən, ndə nə nə, sə tə pa v tun cuna. Yá v m̀ yı liù tə, v nə vıga, sə v tun cuna. Ku m̀ nə pın, v yı liù tə, v wáá càn v dé də nəba nə bwàni tə wa. ¹⁶ Ku m̀ tə yırı, nə fàrá nə boli Yui tə yıra də nə waa mama. U m̀ Yui tə nə ja pubwanv, v swə nəba. Nə nə yí v yıra, v wá dəri nə yinəgə zənzən, v ga fwa pubwanv nə yıra. Yá v dàn wá san nəba, máńá tə wa, ku nə wá tu ku mə, də nə pià sanv.

5

(Eberə-ba 7.26-28)

¹ Yui *jonwana yun tiàn nəkwıa mama yı, Yui nə yáá kúru wá lià wa, v li v tın, sə v tun Yui tutuı tə ba yuu yırı. U m̀ nə pın *jonı wiən tə Yui nə, v ga fwa jonı, ba cuna tə yırı, ba nə fwa. ² Yui jonwana yun tiàn nəkwıa tə də tətə jə yìèn, v nə ba diàn jə tə wa ndə ba nə. Ku m̀ nə pın, v wáá ku nətv tə nə, v twá v ma ni lià tə nə yèri Yui cwəıə tə, ku pa ba jén ka wa yoo dèń. ³ U də nə ba diàn jə tə nə pın, v mə, sə v fwa jonı, lià tə cuna yırı, də v də tətə cuna yırı.

⁴ Liù təlól, v nə wá pa dun v tiàn nə, v swın də, v m̀ yı Yui jonwana yun tiàn nəkwıa. Jonwana yun tiàn nəkwıa yı, Yui nə yáá bon ku tíu tə, ndə v nə kúri *Arón nətv tə. ⁵ Mə, ku yı nətv, ku pa Zwezi-*Kərisə nə. Ku tà v tətə nə pın dun v tiàn nə, v ga swın də, v ya Yui jonwana yun tiàn nəkwıa. Ku ya Yui nə kúri wá, v swın, v wú:

«À pià à biri də, n mù nə yi à biú. Zèn ku tə, à mù Yü nə yi n nyina».

⁶ Yü tətə nə kúv swìn bwálí don nə v sagi tə wa, v wú:

«N yi jonwanu wuuu, ku májá nə bá zwèe, ndə Meləkisedekə* nə».

⁷ Zwezi-Kərisə nə yin tia yuu wa, v jun Yü, v lòri Yü, də v bwé, də v bubwi, v kəni yi nə də yina. U yəə də, Yü wáá wá v jonə tian wa. Yá Yü cugu v kori, v san wá, v nə yi liú tə, v nə twá v mù Yü cwəjə tə nə zəni yiri. ⁸ Ku yi cígá, Zwezi-Kərisə ya Yü biú. Yá də ku mama, v twá v càn tə nə, v ma kwè ka sèe nii. ⁹ Yü pin Zwezi yi liú tə, v yoo mama nə zion. Ku mù nə pin, síyn nə, là tə mama nə sèe Zwezi-Kərisə nii, ba wá twá wá, ba na mu tə, ku nə ba zwèe Yü con. ¹⁰ Yü ti wá, v ma fwa v jonwana yun tian nəkwia ndə Meləkisedekə nə.

*Á kənə diàn, á va yáá Yü nyian tə wa
(1 Korəntə tian 3.1-3)*

¹¹ Nə jə yien zənzən, nə swìn yoo ku tə yuu wa, tə yien tə dən gwiun dan nə cà, á nə jigə là tə, á nə ba yoo dən ni lala, tə yiri. ¹² Á mù dan yá yi là tə, á nə me, sə á ya là tə duən karnyina-ba! Yá də síyn mama, á tə yi là tə, ba nə me, sə ba tə kàrà aba Yü sugu tə wa, təntən cígá yien tə. Á tə yi ndə bisíná nə, á tə wàri wodiú kəkəru, á də ndə nəkwina nə. Yü nə á tə pii á pià, sə á njwà. ¹³ Liú tə, v nə njwà yili, v yi bisimaa, v tə ba Yü sugu tə yənu jə, v ga

* **5:6** 5.6 Meləkisedekə yi Yü jonwanu, ba nə swìn v yoo bwálá duən nə.

wàrì ku cígá tē v lwarì. ¹⁴ Wodiu tē nē jē dīàn, yì là tē nē yì nēkwina nyièn. Yá ku tē, ba nē fwa ba mì, dān pìn, ba yèé zēni dē lwanì swíán ba pubuḡi wa.

(Eberə-ba 10.26-31; 12.15-17)

6

¹ Nē dān nē pìà, sē nē ya nēkwina tē yiri, nē dān mē, sē nē yá tētēn kàrà tē, ku nē swìn Zwezi-*Kərisē yoo nē con, vān nē. Nē dān kēnē dīàn, nē va yáá dē kàrà tē, ku nē yì nēkwina kàrà. Nē kúv bā pìi nē swìn yìèn tē yoo, nē nē dí yáá, nē swìn á con. Tē yìèn tētē nē yì: ka vōvəri kwa ka ma sá cuna, ka yágá tutunε tē, tē nē wá kē aba tian cwəḡə wa, nē à yèé, á ka kē á waa Yü nē. ² Nē kúv bā pìi nē bwé kàrà tē, ku nē buri aba, ka lē là níá wa, ku twá dē Yü yiri, ka tún jìàn là yuu wa, dē ka pìi ka bwìn tuga, dē Yü ka buri là talikwa bura. Nē kúv dān ká pìi nē bà tē yìèn tētē yuu wa. ³ Nē dān wá buri kàrà tē, ku nē yì nēkwina nyièn, sē nē va yáá, dē Yü nē pìn cwəḡə.

⁴ Nē buḡa là duēn yoo, ba nē pìi ba tu yokukwīnān tē wa, ba tuḡa. Ba yì là tē, Yü poni tē yà nē pìrì ba. Ba mù là tē, ba nē nì Yü tarpun tē, ba ga na v *Siḡu tē dē, ⁵ ba nì Yü sugv tē nē ywán nētū, ba ga yēni luv, tē nē bīàn, dīàn nē wá yà nētū. ⁶ Yá dē ku nētū mama, ba tē pìi ba yá Yü. Liù kúv wàrì v pìn, ba là tētē pìi ba vōvəri ba kwa, ba ma sé ba cuna tē, nεε bēlē nii nē. Ba mù là tētē dān yì, ndē ba tē pìi ba paa Yü-Biu Zwezi tē dagarv tē yuu wa. Yá ba

mù ga nə pɪn cwəŋə də là duən nə, sə ba twɪn Zwezi. ⁷ Nə tíá tia yoo, nə ma man. Tia tə yáá nywɪn dwèe níá tə nə dáá, tə nə twɪ ka yuu wa. Yá wiən tə nə yɪ wodirən dān yáá pən ka yuu wa, tə nə zìen, tə pa, là tə nə varɪ ka nə. Kɪ nətɪ dān yáá pa, Yɪ fwa zəni ka tia təntə yuu wa. ⁸ Yá kɪ kárá tə dān nə yɪ casuran də gakɔkwɪnan nə ka nan, ka ba funə mama jə. Yá kɪ bá díán, sə Yɪ ma vɪ ka, ɔ dɔgv. Yá kɪ yígúré wa, ka yɪ ba wá dɪ mən ka nə, ka dé ka cùgò.

(Eberə-ba 10.23-24, 32-36)

⁹ Nubisoni-ba, nə nə swɪn kɪ nətɪ, nə yèé zəni də, á mù con, kɪ ba tútɔná jə. Á mù yɪ là tə, á nə wulə cwəŋə nəzəŋu yuu wa. Kɪ mù cwəŋə tə nə wá pa, Yɪ jon aba á cɔna wa. ¹⁰ Yɪ ya liù tə, ɔ nə yɪ cígá tíú. Ʋ wàrɪ kɪ tə, á nə fwa tə yoo ɔ swèéé. Ʋ wàrɪ á sonu tə, á nə bɪrɪ wá tə yoo ɔ swèéé. Á tɪn, á pa là tə nə, ba nə yɪ *Kərisə nə tɪ, á ma bɪrɪ kɪ sonu təntə, máŋá don wa. Yá á tə wulə, á fwa kɪ tɔtɔŋɪ təntə síún nə. ¹¹ Nə swə də nə waa mama, sə á liù mama bɪbarɪ ɔ tɔtɔŋɪ tə wa, ɔ ja va, ɔ yí kɪ yígúré. Kɪ nətɪ wá pa kɪ tə mama, á nə jə kɪ yala, wàní kɪ jə kɪ pa aba. ¹² Nə ba swə, sə á ya là tə, á yira nə yɪn. Á yana ndə là tə nə, ba nə keni ba waa Yɪ nə wuuu, ba ga jə pínú, ba ma dānɪ máŋá tə, ba nə wá na wiən tə, Yɪ nə kàn tə nii, sə ɔ pa ba.

Yɪ nikanɪ tə, ɔ nə pɪn Abərahámə nə yoo

¹³ Máŋá tə, Yɪ nə kàn ɔ nikanɪ tə, ɔ pa *Abərahámə nə, kɪ yɪ ɔ dùè, ɔ ma kàn kɪ nii təntə. Liù yà təlè, ɔ nə dwə ɔ mù Yɪ, sə ɔ tɪ kɪ

tíú yiri v ma dù. Yu dàń yi v tətə, v ma dù ka dūrè tə. ¹⁴ U swìn, v wú:
«Cígá mama, à wá fwa à pubwanv tə n yuu wa,
à ga wá pa n dwíí pùlì zənzən».

¹⁵ Abərahame yi v zùrì v yira, v ma diàn ku nikanı təntə. Ku kwa nə, ku tə Yu nə kàn ku nikanı, v pa wá, twi ku jì. ¹⁶ Ləzoni nə pìà ba dù dūrè, ba yàá pìà liù tə, v nə dwə ba, ba ma dù. Ku mù dàń nə yàá bırı də, ba sugv tə ya cígá, yá ba ga kúè wàrì yoo don, ba pìí ba swìn ku yuu wa. ¹⁷ Mə ku yın nətv də Abərahame. Abərahame dwíí tə yà mə, sə ba na zəni wiən tə, Yu nə kàn tə nikanı, v pa ba. Yu yà pìà, sə v bırı ba də cígá mama, v bá lwàn nii ku nikanı tə yuu wa, abada. Ku mù nə pın, v ma dù v sùrí nikanı tə nə. ¹⁸ Nikanı də dūrè yi wiən bələ, tə nə wàrì tə lwànı. Yu wàrì kunkun v kuni, v kəni v nikanı tə, də v dūrè tə wa, abada. Yá ku yoo təntə daŋa nə jìàn. Nə mù dàń yi lià tə, nə nə yá tə mama, nə ga vwə nə tìàn Yu yira, sə nə ga wànı, nə ja yala tə, Yu nə tún v pa nəba. ¹⁹ Yala təntə, nə nə jə, nə mu tə yiri, yi ndə tìú ŋunan nə, tə nə pın, ku zıga diàn. Yá liù tə, nə nə ken nə yala tə v nə, ku yi Zwezi. U mù nə zva Yu *sàń tə wa, v twá Yu *diè tə mimii nii gànù tə wa, v zv v yí Yu dəyaa tə wa, Yu nə wulə lá. ²⁰ Mə lá nə, Zwezi dí nə yáá, v tàà nə yiri, v zv. U jigə Yu *jonwana yun tìàn nəkwia, ndə Meləkisedekə nə. U wá yà nətv, wuuu, máńá də máńá, ku nə bá zwèe.

Meləkisedekə yi pìú, v ga yi jonwanu də

¹ Kù m̀ Meləkisedekə təntə, nə nə dí yáá, nə swìn v yoo, yi tiv tə, ba nə boŋə ‹Salemə›, pìú. U ga yi Yı tə, v nə wulə tə me yuu wa, *jonwanu də. *Abərahāmə nə vəli v ta pèegá duən, v dé, v pìi v b̀àn, Meləkisedekə nan v va v j́rí wá, v ga lòrì Yı, sə v fwa zəni Abərahāmə yıra. ² Abərahāmə pın wiən tə mama, v nə ta pèegá tə v dé v p̀e fugə nii nyiən Meləkisedekə nə. Ba nə gwin Meləkisedekə yırı tə dən, təntən nə, kù yi ‹cígá pìú›. Bələ nii nə, v yi ‹Salemə pìú›, kù də dən nə yi ‹ɸican sié pìú›. ³ Liù mama yèrì Meləkisedekə nuu də v nyına. Ba yèrì v nıbara dəkúu. Liù mama yèrì v luri máŋá, nə à yèè v tıan máŋá. U nyın də Yı-Bıu tə, v ga yi jonwanu, wuuu, kù máŋá nə ba zwèe.

⁴ Á nəŋə, Meləkisedekə nii nə dù nətı. Nə nıbeε Abərahāmə də tətə pın wá kù tə, v nə ta v dé, tə fugə nii nyiən. ⁵ Yı *nii tə, v nə pın *Moyizə nə, pın cwəŋə *Levi dwíi jonwana tə nə, kù wú: Ba me, sə ba bwe kù tə mama, *Yızərayelə lià tə nə nı, fugə nii nyiən, bwiə. Ba me, sə ba bwe kù bwiə Yızərayelə lià tə con, ba də ga yi ba nubıa, Abərahāmə dwíi tə wa. ⁶ Meləkisedekə m̀ tà Levi dwíi tə wa liù. Yá də kù me, wiən tə mama, Abərahāmə nə ta v dé, Meləkisedekə nı tə fugə nii nyiən. Meləkisedekə ga tə yi liù tə, v nə lòrì Yı, sə v fwa zəni Abərahāmə yıra, v nə yi liù tə, v nə nı Yı nıkanan tə. ⁷ Kù bá tútúná jə, kù yi ləzwənfaru nə yáá lòrì Yı, sə v fwa zəni, v pa ləzwənbıə nə. ⁸ Levi dwíi jonwana tə nə jonə Yızərayelə

lià wiən fugə nii nyiən. Ba də yi ləzoni, ba nə tu. Mələkisedekə m̀ jon Abərahāmə wiən fugə nii nyiən, yá v m̀ Mələkisedekə tə wulə mi wa, ndə Yu sagı tə nə swın ku yoo nətı. ⁹ Sı́ún nə, ku yi Levi nı́án tə nə jonə Yızerayelə lià tə wiən fugə nii nyiən. Ku yi nətı, nə ga wàá nə swın də, Levi də tətə twá Abərahāmə dwanı nə, v pa v fugə nii nyiən Mələkisedekə nə. ¹⁰ Nə yə́é, Abərahāmə də Mələkisedekə nə jóri duən, máǵá tə wa, də ba tə wà Levi lı́rı. Yá Levi dǎn yà wulə v nı́beε dwı́ı tə wa, ku nə bı́án.

Zwezi-Kərisə yi Yu jonwanı ndə Mələkisedekə nə
(Eberə-ba 9.6-12; 10.10-14; 19.22)

¹¹ *Yızerayelə lià tə Yu *nii tə, v nə pın *Moyizə nə, sagı tə wa, ku bı́rı də, Yu *jonwana tə mə, sə ba nan *Levi dwı́ı tə wa, sə ba ya Yu jonwana ndə *Arɔn nə. Yá ba dǎn wà ku tutı́ı tə wǎnı́ ba tun, ba pa ku nii sú. Ku m̀ nə pın, ku mə, sə Yu jonwanı nan, v nə yi ndə Mələkisedekə nə. ¹² Yá də Yu nə tún jonwana yırı don, ba nə tà jonwana ndə Levi nə, ku yi kálú, sə Yu nii tə də, v nə pın *Moyizə nə, lwǎń. ¹³ Sı́rǎn tə tə yi nə *Yuu-Tiu yoo nə, tə swın. U yi liù tə, v nə nan dwı́ı don wa. Ku m̀ dwı́ı tə wa, liù tǎ́lǎ lá nə, v nə tun jonwana tutı́ı. ¹⁴ Nə yə́é pwənə pwənə də, nə Yuu-Tiu Zwezi yi ba lı́rı Zwida dwı́ı tə wa. Yá máǵá tə, Moyizə nə swın jonwana tə yoo, v wà ku dwı́ı tə yoo swın. ¹⁵ Á nənə won tə nə pın, yièn tə dǎn kwen, tə yi nəpon nəpon. Jonwanı don twi, v nə nyın də Mələkisedekə. ¹⁶ Yu wà v nii tə, v nə pın Moyizə

nə, twá, v ma tún Zwezi, sə v ya Yı jonwanu. U yı v jigə Yı jonwanu, v nə jə diàn, sə v ya mı wa, kv nə bá zwèe abada, tə yırı. ¹⁷ Yı sagı tə swın kv yoo tə, kv wú:

«N yı Yı jonwanu wuu, kv máǵá nə bá zwèe, ndə Mələkisedekə nə».

¹⁸ Kv yı cíǵá, dí yáá nə cwəǵə tə, Yı nə tún, yá ba diàn jə, kv ga bá là nə saǵa. Kv mù nə pın, Yı dugv ka mù fuən fuən cwəǵə təntə. ¹⁹ Yı nii tə, v nə pın Moyizə nə, yá wàrì ləzoni kv pın, ba jì là tə, ba yoo mama nə zıən Yı yáá con. Yá síún nə, won wulə, kv nə dwə v nii təntə. U nii təntə yı yala tə, nə nə twá tə nə, sə nə boli Yı yıra.

²⁰ Kv tə nə súrı lá, máǵá tə, Yı nə tún v jonwanu Zwezi-*Kərisə tə, v dí yáá, v dù, v ma tún wá. ²¹ Yá Levi dwíı jonwana tə mù yı ba yáá tún, ba ga ba dūrè dwì. Yá Yı dùè də Zwezi mù, v swın, v wú: «À dùè də, n wá yá à jonwanu wuu, máǵá də máǵá, kv nə ba zwèe. À mù Yuu-Tiu bá lwàń kv yoo tə». ²² Kv mù nə pın, nə mə, sə nə lwarı də, *nimaru tə, nə nə jə də Zwezi, zəni dwə nimardwan tə. ²³ Kv tə nə súrı lá, Levi dwíı jonwana tə yın dání zənzən, ba nə yáá tı, ba ga lwàní duən yuu nə tə yırı. ²⁴ Yá Zwezi mù tà nətv. U mù wulə mı wa wuu, liù ga təló, v nə wá lwàń v yuu nə, v ya Yı jonwanu. ²⁵ Kv mù nə pın, v jə diàn máǵá mama, sə v jon là tə ba cuna wa, ba nə twá də wá, ba bà Yı con. U cíǵá nə wulə mı wa wuu tə pın, v lòrì Yı máǵá mama, v pın ba.

²⁶ Zwezi yı Yı nə tı, v ba cuna jə, v ba durən

jə. U pwèe v tiàn də là tə nə fwa cuna. Yá Yı dání zın wá, v jəń wiən tə mama yuu Yı sàń nə. Kú mù nə pın, Zwezi nə yı Yı jəwana yun tián nəkwıa tə, v nə me də nəba. ²⁷ U tà liù tə, v nə me, sə v fwa *jəńi dıın mama. U tà liù tə, v nə wá dí yáá, v fwa jəńi v tətə cuna yırı. Kú kwa nə, sə v dání fwa là tə duən də cuna yırı, ndə Yı jəwana yun tián nəkwına tə duən tə nə. Zwezi mù yı v tətə nə, v ma fwa jəńi*, naa nədu cıı, nə cuna yırı. Yá kú jəńi təntə me nətv. ²⁸ Yı nii tə, v nə pın Moyizə nə, yáá pın cwəńə, sə ba tın jəwana yun tián nəkwına, ba nə yı ləzoni, ba nə bwàná yìèn duən wa. Kú mù kwa nə, Yı dùè dùrè, ka nə jəń v nii tə, v nə pın Moyizə nə, yuu nə. U twá dùrè təntə nə, v ma tın v biù tə, sə v ya Yı jəwana yun tián nəkwıa, v yoo mama nə zıèn v mù Yı yáá con, máńá mama wuuu, kú nə ba zwèe.

8

Zwezi yı nə Yı jəwana yun tián nəkwıa (Eberə-ba 9.6-12; 12.24)

¹ Nə sugv tə wa, á nəńə yoo tə, kú nə dé lá. Nə cígá jə Yı *jəwana yun tián nəkwıa təntə, v jəé Yı *sàń nə, Yı tə, v nə jə dıàn jızən* vàn nə. ² U jəé v tuńa v tutuńı tə Yı dəyaa tə wa. Kú mù bwálı təntə nə yı Yı sàń cígá cígá. Kú tà

* **7:27** 7.27 Kú jəńi təntə nə yı v tıan tə, v nə tıga dagarv tə yuu wa. Ywáń Matıə 27 tə wa. * **8:1** 8.1 Ka jəń pıù jızən vàn nə yı dun bwálı.

Yü *wulu gansili† tə, ləzoni nə fwa də ba jà̀n. Ku ya Yü tətə nə fwa ku. ³ Yü jonwana yun tian nəkwia mama yi ba tún, sə v fwa zilé wiən, v pa Yü nə, sə v gv vaná, v ma fwa *jonə, v pa wá. Zwezi də mə, sə v ja won, v nə wá pa Yü nə. ⁴ Zwezi yà nə wulə luv wa, v yà bá ya Yü jonwanv də tətə. Yü jonwana duən wulə, ba nə pın zilé wiən Yü nə, ndə Yü *nii tə, v nə pın *Moyizə, nə pın cwəŋə nət. ⁵ Ba mù Yü jonwana təntə tɔŋa Yü wulu gansili. Yá Yü wulu gansili təntə yi, ku tə nə wulə Yü sán nə, nyinyiga. Ku yi Yü wulu gansili tə cígá cígá, ka nə wulə Yü sán nə, yuywara. Máná tə, Moyizə tə nə wà Yü wulu gansili tə fwa, Yü pın wá nii, v wú: «Ywà́n, n wá fwa ku mama, ndə ku nyinyiga tə nə, à nə biri mú paan‡ tə yuu wa». ⁶ Zwezi mù tɔtɔŋi tə, Yü nə pın wá, dwə jonwana tə mama tɔtɔŋi tə zənzən. Mə nət nə Yü nikanı tə də, v nə kàn də wá, dwə dí yáá nikanı tə, v nə kàn də nəba, nimardwan tə wa. Ku mù nə pın, v dà́n wulə Yü də ləzoni pwərə wa, v kəni ba *nimarv, ku nə dwə dí yáá nimarv tə.

⁷ Təntən nimarv tə yà nə ba ylèn jə, tə nə mùri ku wa, ku yà ba dən jə, sə ba lwàn ku yuu nə də bələ nii nimarv. ⁸ Nə nı də, təntən nimarv təntə yuu wa, Yuu-Tiu caga v lià tə nii nə, v wú: «Á nəŋə, máná biàn, à nə wá fwa nimarv nədun

† 8:2 8.2 *Yizərayelə lià tə yà yi ku mù gansili təntə yiri wa nə, ba jùnì Yü, máná tə wa, Moyizə nə pın ba Yü *nii tə. Ku máná tə wa, də ba tə wà Yü *diè lwə də kapana. ‡ 8:5 8.5 Ku yi paan, ka nə wulə kasə lanworu wa, ba nə bonə ka *Sinayi. Ka mù paan təntə yuu wa nə, Yü pın v nii tə Moyizə nə.

də *Yüzərayelə là tə, də Zwida dwíí là tə.
 9 Kú nimarv tə bá ya ndə dí yáá nimarv tə
 nə, à nə fwa də ba nıbara-ba. Kú nimarv
 təntə, à nə dí yáá, à fwa də ba, à jın ba jın
 nə, kú dıın tə nə, à van à ja nan *Ezwipətə
 wa».

Yuu-Tiu tə píı v swın, v wú:

«Ba wà à nimarv tə nii nə twá. Kú mù nə pın, à
 də ma dıgv ba tıa».

10 Yuu-Tiu kúò súrí lá nə, v wú:

«Á nəjə nimarv tə, à nə wá fwa də Yüzərayelə
 là tə, máńá, kú tə nə bıàn, wa. Á wá tún à
 conjı tə ba pubıja wa, à ga wá pa, ba ja tə
 ba waa con. Á wá yà ba Yıı, ba də wá yà à
 mù là. 11 Liù kúò bá ya lá, v nə wá zàn, v
 kàrı v tıv liù don, nə à yəé v nubıu, v wú:
 «Báá yəbə n lwarı Yuu-Tiu!» Ba mama tə
 míámıán wá yəni nə, kú nə zıgı bıımaa,
 kú ja va nəkwıa. 12 Á ga wá kwen ba cına
 tə à lı à mù də ba pwərə wa. Yá à kúò ba
 píı à liı tə yoo».

13 Də Yıı nə swın nimardıv tə yoo, sə nə yəni
 də, təntən nyıen tə mù dán jigə wodwan. Yá won
 tə nə yı wodwan, kú nə kwın, kú píà kú bırı də,
 kú won tə kúò bá dán, kú ma jén lá nə.

9

Təntən nimarv jonjı tə yoo

1 Təntən *nimarv tə yà jə bwalı tıa yuu, yá nə
 lı, v kwen, v tún, ba jònı wá kú wa. Kú yà jə kú
 conjı, ba nə tún ba twá tə nə, ba ma fwa yıjıvı
 təntə. 2 Kú yı cígá, ba yà fwa Yıı *wulu gansılı,

ku nə jə dəbta bələ. Ba boŋə ku dəbiu don kwa con diè tə, ku nə yɪ Yɪ nyiən. Ku diè təntə wa nə, ba yà tún canzɪɔ, ku pɪna barpe, də dipen tə, ba nə tún ba pa Yɪ nə, də tabɪɔ. ³ Gansili tə bələ nii dəbiu tə mimii jə gànò don. Ba boŋə ku bələ nii dəbiu təntə, də dəyaa dəbiu tə, ku nə yɪ Yɪ ciɪ nyiən.

⁴ Ba fwa síán *jɔŋi kúrí, ba tún ku bwálí tə wa. Mə lá nə, ba sɪrɪ tɪralɪ tə. Yá mə bwálí təntə wa nə, nɪmarɔ daka tə, ku nə pəri də síán, yà wulə. Síán zɔŋa yà wulə ku daka tə wa, də ku wa wodiu don, ba nə ma boŋə <manə*. *Arɔn daduu tə, ku nə pən vɔran, də yà wulə ku daka tə wa. Kapanɪpe bələ tə, ba nə púpúní nɪmarɔ sùràn tə, tə yuu wa tə, də yà wulə ku wa. ⁵ Daka tə yuu wa, ba fwa wiən bələ, tə nə yɪ ndə *malɪkə nə, ba kə lá. Tə jə dun zənzən, tə ga bɪrɪ də, Yɪ wulə ku bwálí tə wa. Tə vànà tə ywárí púé bwálí tə nə, ba nə kəni jana tə, sə tə sɪn cɪna tə. Máná təlɔ síún nə, sə à gwɪn tə yìèn təntə mama dèń, à bɪrɪ aba. ⁶ Yɪ wulu gansili tə pwèe bwálá bələ. Dɪn mama, Yɪ *jɔŋwana tə zwi ku kwa con diè tə wa, ba fwa ba tutɔŋɪ tə. ⁷ Yá ku dəyaa tə mù yɪ, Yɪ jɔŋwana yun tián nəkwɪa tə ciɪ nə wáá lá nə, ɔ zwi bɪnɪ wa, naa nədɔ. Ku bwálí tə wa, ɔ mɛ, sə ɔ ja vanɪ tə, ɔ nə ma fwa jɔŋi tə, jana, ɔ ja zɔ lá, ɔ pa Yɪ nə, ɔ tətə cɪna yɪrɪ, də cɪna tə yɪrɪ, *Yɪzərayelə lià tə nə tɔn də ba yèrɪ. ⁸ Á nəŋə ku tə, Yɪ-*Sɪŋu tə nə pià, sə ku twá ku yoo tə nə, ku bɪrɪ nəba. Ku pià

* **9:4** 9.4 Manə yɪ wodiu tə, Yɪ nə pɪn *Yɪzərayelə lià tə nə, kasɔɔ lanworu tə wa.

ku biri nəba də, máǵá tə mama Yı wulu gansili tə kwa con diè, tə nə wá yà lá, Yı dəyaa mimii tə bá súrí, sə lià zv. ⁹ Ku yoo tə nyınyıga yı, ku biri nəba yièn, tə nə biàn síún. Ku yı ku biri nəba də, wièn tə, ba nə pın Yı nə, də jwəǵə tə, ba nə fwa, ba pın wá, wàrì yokukwınan tə tə lı ləzoni tə pubıǵı wa, ba nə fwa. ¹⁰ Tə coǵı təntə yı tə wulə ləzoni yıra yırı, ba wodiu yuu yırı, də ku tə nə nywın yuu yırı, də naswıa yirə yirə yırı. Tə mù coǵı təntə yà tún, tə yoo yà dé lá, ku ja va máǵá tə, Yı nə lwàń wièn tə.

Zwezi-Kərisə joǵı tə yoo
(Eberə-ba 12.24)

¹¹ Zwezi-*Kərisə yı v twi ndə Yı *joǵwana yun tiàn nəkwıa nə, sə Yı twá də wá, v pa nəba wozəǵə tə, tə nə manwarı tə wulə. V nan Yı *wulu gansili tə wa. Ku gansili təntə tà ləzoni nə fwa də ba jìàn. Ku pìà ku biri də, gansili təntə təlè tıa yuu yəbə. Ku gansili təntə zièn, ku doni tıa yuu nyièn tə. ¹² Zwezi-Kərisə yı naa nədv cıci nə, v zva Yı wulu gansili tə dəyaa tə wa. Ku tà butulan, də nabii jana nə, v ja zv ku bwálı tə wa. Ku yı v tətə jana nə, v ja zv, sə v ma yè nəba v jon, sə nə tıni nə tiàn, máǵá tə, ku nə ba zwèe. ¹³ Fuən nə, ba yàá gv butulan də nabıran, ba lı tə jana tə, ba mí lià tə nə cùǵù tə yuu wa. Ba yàá gv nacıın, ba surv, ba pèe ku tınan tə, ba lwá lià tə yuu wa, ba nə fwa cına. Ba nə fwa ku nətv tə, ba zwèe, ba lià tə dǵn ya Yı nə tı, ba cına də sın, tə nan ba yıra†. ¹⁴ Də ku

† 9:13 9.13 Ba lià təntə dǵn wáá ba píı ba tıǵa ba pın Yı nə.

nətu tə nə yi cígá, sə nə lwarı də, Zwezi-Kərisə jana tə dwə tə vana tə jana tə. Kərisə tə, v nə wà cuna tun, v twá Yu-*Siñu tə diana, tə nə ba zwèe tə nə, v pa v tian Yu nə, ndə jonı vanı nə. U jana tə dań wá sın yokukwınan tə nə pubuñı wa, tə li, sə nə kúvè dān ká fwa tutunkukwınan, tə nə wá ja nəba, tə va tian wa. Ku mù dān nə wá pa, nə fwa Yu tə, v nə wulə mı wa, tutuñı tə.

Jana tə yi tə bırı Yu nımarv tə

¹⁵ Zwezi-*Kərisə yi liú tə, v kəni *nimardun Yu də lià pwərə wa. Zwezi tıga, sə v jon lià tə, ba nə fwa cuna nimardwan tə máñá wa. Yá lià tə, Yu nə kúrí, dān wá na wozəñə tə, v nə kàn nii, sə v pa ba. Tə wozəñə təntə wulə máñá mama wuu, tə ga ba cùgà.

¹⁶ Liú wáa sagı v púpúnı, ku nə bırı nətu tə, ba nə me, sə ba tərı v jıjə, də v nə tıga. Ku dān nə yi v tian kwa nə, ba me, sə ba swın v wıən tə tarv yoo. ¹⁷ Ku yi cígá, tian kwa, wotarı sagı jə funə, də liú tə, v nə púpúnı ku sagı tə, nə tıga. Liú tə, v nə púpúnı ku, nə wà tı, ku sagı tə ba funə jə.

¹⁸ Ku mù nə pın, Yu wà təntən nımarv tə tətə tın, də jana wà lwé. ¹⁹ Ku yi cígá, *Moyizə dí yáa v kərı Yu *nii tə mama, ndə ku nə púpúnı Yu nii sagı tə wa nətu, *Yızərayelə lià tə mama yáa con. Ku kwa nə, v tı nabii jana, də butulan jana, də níá, v kə duən nə. U kén tıv don vuran, ba nə boñə yızopə, də piə kuran tə nə yi ndə gunən nəstıan nə, v kə jana tə wa. U dān li tə, v mí v kə Yu nii sagı tə, də lià tə yuu wa. ²⁰ Máñá tə nə, v nə wulə v mí tə, v kəni ba nə, v swın

ba con, v wú: «Kv tē yi jana tē, Yu nē ma kēni v nīmarv tē v mē dē á mē pwərə wa, sē á zīlī kv nīmarv tē nīi». ²¹ Kv kwa nē, v yáá mī tē jana tē nētv, Yu *wulu gansili tē yuu wa, dē tutunzila tē mama yuu wa, ba nē yáá ma fwa Yu tutunji tē. ²² Kv nē yi dē Yu nīi sagi tē mē, tutunzila tē zōni mama, durən sīn tē nan dē jana tēntē. Yá jana dān nē wā lwé, Yu bá sēe, v kwēn cōna tē, v li nē mē dē wá pwərə wa.

Zwezi-Kərisə vəli Yu sàh, nē mē yiri

²³ Wiən tē, ba nē ma fwa Yu tutunji tē dí yáá nē, yà yi Yu sàh wiən tē nyinyiga. Tē wiən tēntē yà mē, sē ba sīn tē jana wa. Yá Yu tutunzila, tē nē wulə v sàh nē, dē mē, sē ba sīn tē jana wa. Kv mē *jonji tēntē mē, sē kv doni. Kv mē nē yi Zwezi jana tē. ²⁴ Zwezi-*Kərisə wā Yu *wulu gansili tē, ləzoni nē fwa dē ba jìàn, wa zwī. Kv gansili tēntē yi Yu sàh tē nyinyiga. Yá Zwezi-Kərisə mē dān zva Yu sàh tēntē wa. U wulə kv wa sív nē, v lòrì Yu v pīn nēba, Yu yáá con. ²⁵ U wā lá zwī, sē v fwa jonji nēe kapovv, ndē Yu *jonwana yun tìàn nēkwīa tē nē. Ba mē nē yáá zv Yu wulu gansili tē dəyaa tē wa bīni mama, dē wiən duən jana. Zwezi-Kərisə mē yi v zva lá dē v tētē jana. ²⁶ Kv yà nē wā nētv yīn, v yà wá dé càn nēe kapovv, kv nē zīgī luv dēn laŋv máná, kv ja vėli wuuu. Cígá, v twī, v bīri v tìàn naa nēdv, sē v ma zwēe fuən máná tē. U tī v tìàn, v ma fwa jonji, v ga twá v jonji tē nē, v ma cùgù cōna dīàn. ²⁷ Liù mama yi naa nēdv cīci nē, v mē, sē v tī. Kv kwa nē, kv tíú vėlē Yu yáá con,

sə Yu bürì v bürà. ²⁸ Mə nətʋ nə, kv pa Zwezi-Kərisə nə. U tì v tiàn, v ma fwa jonji naa nədu cici. U fwa kv, sə v ma wàní v li là zənzən ba cuna wa. U tə wá pií v buri v tiàn, nəə bələ nii nə. Yá kv dàń nə kúv tà, sə v li là ba cuna wa, kv yi, sə v jon là tə nə dàni wá.

10

*Zwezi-Kərisə twi, sə v fwa kv tə, Yu nə pià
(Eberə-ba 9.7-15, 23-28)*

¹ Yu *nii tə, v nə pin *Moyizə nə, yi ndə wozəŋə nə, tə nə biàn, nyinyiga nə. Yá kv dàń nə tà tə cígá cígá tə, nə nə wá na tə nə kv buri nəba. Yu nii yoo təntə pià, sə ba fwa *jwəŋə yiri nədu bini mama. Kv mù nə pin, Yu nii yoo təntə wàri là tə, ba nə boli Yu yira, kv pin ba yanì là tə, ba yoo mama nə zien v yáá con, abada. ² Kv mù jwəŋə təntə yà nə jə diàn, sə tə sɪn ba là təntə cuna naa nədu, ba yà kúv bá pií, ba bún ba cuna tə yoo. Yá ba yà kúv bá pií ba fwa jonji, abada. ³ Yá kv dàń twá kv mù jwəŋə təntə nə, ba ma líi ba cuna tə yoo bini mama. ⁴ Kv nətʋ tə fwa, nabıran də butulan jana nə wàri ləzoni cuna tə li abada tə yiri. ⁵ Kv mù nə pin, máŋá tə, Zwezi-*Kərisə nə biàn luv wa, v swìn Yu con, v wú:

«N ba jonji, nə à yèé zilé wiən pià, yá n fwa yira, n pa nə. ⁶ Vána tə, ba nə gua, ba suri jwəŋə kúri tə yuu, də jwəŋə tə, ba nə fwa cuna yiri, ba n pùé poli. ⁷ Kv mù yiri, à dàń swìn n con, à wú: Nèń à nə, à twi, sə à fwa kv tə, n mù Yu nə pià. Kv mù

yoo təntə yi ku púpóní n sagi tə wa à mù yiri».

⁸ Zwezi-Kərisə dí yáá, v swìn Yü con, v wú:

«N ba jwəŋə də zilé wiən jələ. N ba vana tə, ba nə gva, ba suri jonji kúrí yuu, də jwəŋə tə, ba nə fwa cuna yiri, jələ. Tə ba n pùé poli».

Yá Yü nii tə, v nə pin Moyizə nə, biri də, tə jwəŋə təntə mama me, sə tə fwa. ⁹ Zwezi-Kərisə kúbù pii v swìn, v wú: «Nəń à nə, à twi, sə à fwa ku tə, n nə pià». Ku nətv dàń pià ku biri də, Zwezi-Kərisə mù ken fuən jwəŋə tə vən nə. U lwan tə də, v mù tətə jonji tə. ¹⁰ U fwa ku tə Yü nə pià. U ti v tətə ləzwəndɔɔ tə, v ma fwa jonji, v pa nəba naa nədv ciɔ, ku mù dàń nə pin, nə sɪn nə tiàn, nə li nə cuna wa.

¹¹ Yü jonwanv mama mù yi dun mama, v ziga yu nə, v fwa jwəŋə máńá mama, Yü yáá con. U yáá fwa jwəŋə yiri nədv, də v bwé, yá tə jwəŋə tə wàri cuna tə li abada. ¹² Zwezi-Kərisə mù fwa jonji nədv ciɔ, cuna yiri, ku nə dé lá, máńá mama wuu. Yá ku kwa nə, v yi liù tə, v dàń nə jèé Yü jizən* vən nə. ¹³ Síún nə, v dàń yi v dànì, sə Yü kə v dɔŋa tə v nəɛ dən. ¹⁴ Zwezi-Kərisə twá jonji nədv nə, v pa lià tə, v nə sɪn ba cuna v li, yoo mama dàń ziən máńá mama, wuu.

¹⁵ Yü-*Siŋu tə də biri ku nətv tə nəba. Ku mù nə pin, ku dí yáá, ku swìn, ku wú:

¹⁶ «*Yuu-Tiu swìn, v wú: «Á nəŋə *nimarv tə, à nə wá fwa də ba, ku dian təntə kwa nə. À wá tún à conji tə ba pubɔŋa wa, máńá, ku

* **10:12** 10.12 Ka jən piú jizən vən nə yi dun bwálí.

tə nə bìn wa. À ga wá pa, ba ja tə ba waa
con».»

¹⁷ U tə swìn ku kwa nə, v sùrí lá, v wú:

«À kúù ba pìi à líi ba cuna tə, də ba yokukwınan
tə, ba nə tın, tə yoo».

¹⁸ Yıı nə kwən cuna v ıı, ku kúù wà me, sə ba
fwa zilé wiən, ba ma ıı tə cuna təntə.

Nə dànà ká pìi nə va nə kwa!

(Efəzə tián 2.13, 18; 4.14-16; 6.4-20; 12.25-29)

¹⁹ À nubıa-ba, Zwezi nə lwá v jana tə pın, nə
yèé cígá mama, də nə jə cwəŋə, sə nə zv bwálí
tə, Yıı nə wulə, yá fən ga təl. ²⁰ Zwezi sùrú
cwəŋə nədın, v pa nəba. U cırv mimii nii gànò
tə, ku nə pwèe nə mù də Yıı duən nə. Ku cwəŋə
təntə pın mı là nə. Mimii nii gànò tə nə cırv
tə yı, ku bırı Zwezi tətə ləzwəndɔɔ tə, ba nə paa
dagarv tə yuu wa. ²¹ Yá nə dāń jə Yıı jəŋwana
yun tián nəkwıa, ba nə tın, sə v ya Yıı diè tə
yuu wa. ²² Ku mù tə yırı, nə dāń fàrá nə boli
v yıra də bıcan nədın. Nə kənə nə waa mama
míámíán Yıı nə wuu. Nə pıan, Zwezi jana tə
sın nə pubınkukwınan tə, tə ıı, sə nə ga swe nə
yıra də níá tə, nə ba durən jə. ²³ Yıı fwa nıkanı.
Yıı mù yáá fwa máŋá mama ku tə, v nə swìn də,
v wá fwa. Ku mù nə pın, nə kúù dànà ká pa nə
jìàn gwàrì, nə swián ku tə, nə nə jə ku yala tə
yoo. ²⁴ Nə ywàŋá duən yuu. Nə daŋa duən jìàn,
sə nə ma wàní nə sóní duən, nə ga fwa ku tə nə
ziən. ²⁵ Nə dànà ká dəri, nə yá nə Kərisə là púlí
tə nə, ndə ku nə yı là duən yofwamıvın nə, ba
nə yáá kúù ba ba púlí tə wa twi. Nə daŋa duən

jìàn. Nə fwa nətʋ wuuu, nə sùrí lá, nə nə yèé də, Yuu-Tiu Zwezi-Kərisə túrí dɪn tə bwələ yɪɪ.

²⁶ Nə yèé cígá tə, nə ga sèe ka də. Kʋ kwa nə, nə nə sɪnɪ, nə fwa cʋna, nə dàń mɛ, sə nə yəni də, jonɪ təlɛ́, kʋ nə wá lɪ tə cʋna tə nə yuu wa.

²⁷ Də nə nə fwa kʋ yoo tə, yoo tə, kʋ dàń nə ga, kʋ mù nə yɪ, sə nə dàn yoo tə, nə wá bà də nə vɪvaga. Kʋ mù nə yɪ Yɪ b̀r̀rà tə, də mən, tə yoo

nə cà, tə nə wá dé Yɪ dɪɲa tə. ²⁸ Á yèé də, liù nə c̀g̀g̀ Yɪ *nii tə, ʋ nə pɪn *Moyizə nə, kʋ mɛ, sə lià tə nə nɪ wá, yí bələ, nə à yèé batwa, ba swɪn də, ʋ cígá c̀g̀g̀ kʋ. Kʋ kwa nə, ba dàń wáá ʋ mù liù təntə ba gwɪ, ba ga ba ʋ yinəgə dəri.

²⁹ Mə kʋ yɪ nətʋ, kʋ pa liù tə nə, ʋ nə c̀g̀g̀ Yɪ nii tə, ʋ nə pɪn Moyizə nə. Yá liù tə, ʋ nə yalɪ Yɪ-Biu tə, kʋ dàń wá yà nətə, kʋ pa ʋ mù nə? Kʋ tíú təntə zɪnɪ *nimarʋ jana tə, tə nə sɪn wá, tə lɪ ʋ cʋna tə wa. Kʋ tíú twɪn Yɪ-*Sɪɲu tə, kʋ nə pɪn, nə lwarɪ Yɪ pubwanʋ tə. Kʋ mɛ, sə kʋ tíú na cà, ʋ doni. ³⁰ Nə yèé Yɪ zəni, ʋ nə swɪn,

ʋ wú: «Á yágá, sə à mù nə fwɪn à lɪɲa lià tə nə vɪga tə yuu wa. À wá ɲwɪn kʋ tə nə mɛ də ba liù mama, à pa wá». Kʋ tə nə sùrí lá nə, kʋ tə púpúnɪ Yɪ sagɪ tə wa, kʋ wú: «À mù Yuu-Tiu wá b̀r̀r̀ à lià tə b̀r̀rà». ³¹ Kʋ yɪ cà, nəfərʋ, kʋ pa liù tə nə, Yɪ tə, ʋ nə wulə mɪ wa, nə wá ja, ʋ kə ʋ jìàn wa!

³² Á lie á tìàn, kʋ tə nə tɪn, kʋ le máná tə wa, á yíá nə twi tə porɪ Yɪ cwəɲə tə wa. Kʋ máná tə wa, á dí cà, zənzən, yá á ga zɪɪ dɪàn, á dé dɪàn də yaɲwɪa. ³³ Dɪn don nə, á yɪ ba yáá twɪn, ba

pa, á dé càn là tə me yáá con. Nə à yèé, á yáá kə á nii là tə kwa, ba nə fwa tə yìèn tə ba yira. ³⁴ Á cígá sèe, á dé càn, də là tə nə wulə bǎn diè wa. Á sèe, sə ba jon á jǐjə wiən, də pupwən, á nə yèé də, á jə jǐjə wozəŋə tə nə dwə nətʉ, tə nə wulə wuuu, tə bá zwèe, yiri. ³⁵ Ku mù tə yiri, á dànà ká pa, fən ja aba yoo wa. Ku mù nə wá pa, á na ŋwírán, tə nə dáá. ³⁶ Á yì là tə, á nə me, sə á ja pínú wuuu, á dànà ka píí á kə kwa, á ma fwa ku tə, Yıı nə pìà. Á nə fwa ku nətʉ tə, á wá na ku tə, Yıı nə kǎn nii, sə ʋ pa aba. ³⁷ Ku púpúní Yıı sagı tə wa, ku wó:

«Ku ga mǎǎ́ mancın, sə liù tə, ʋ nə bǎn tə, bà. U wá bà sún sún. ³⁸ Liù tə, ʋ nə ken ʋ waa à nə, ʋ yì cígá tíú à yáá con. Ku tíú ga wá yà mu wa, ku nə ba zwèe, Yıı con. Yá ku tíú dàn nə píí ʋ kə ʋ kwa, à pùé kùbù bá ya ywání də wá».

³⁹ Nə mù tèlé də là tə, ba nə píí ba kəni ba kwa, sə ba jén. Nə mù yì là tə, nə nə keni nə waa Yıı nə wuuu, sə ʋ jon nəba nə cɔna wa.

11

Nə kənə nə waa Yıı nə wuuu, ndə nə nɪbara-tə nə

(Zwan 8.56; 1 Piyerə 1.8)

¹ Də liù nə keni ʋ waa Yıı nə wuuu, ku dən nə yì bèèe? Ku dən nə yì, ʋ dí yáá, ʋ yèé də, ʋ jə wiən tə, ʋ nə jə tə yala. Yá ku yì, sə ʋ ya liù tə, də ʋ nə yèé də, wiən tə, ʋ nə ba na yii wa, wulə cígá cígá, ʋ ba tə yoo bèèé.

² Nə nɪbara-ba tə ken ba waa Yɪ nə wuuu, kɪ m̀è yɪrɪ nə, Yɪ dàń bɪrɪ də, ɒ pùé poli ba yuu wá.

³ Nə də keni nə waa Yɪ nə wuuu. Kɪ m̀è nə pɪn, nə yèé də, kɪ yɪ kɪ twá ɒ sɒgɒ tə nə, lɒɒ ma fwa. Mə kɪ twá nətɒ, nə dàń ma yèé də, kɪ yɪ, Yɪ twá wiən tə nə, nə yíá nə ba na, ɒ ma fwa wiən tə, nə yíá nə na.

(Tɒtvnan 7.2-7, 20-36)

⁴ Abelə* ken ɒ waa Yɪ nə wuuu. Kɪ m̀è nə pɪn, ɒ ma fwa *jɒŋi, kɪ nə ziən, kɪ doni Kayen jɒŋi tə. Yɪ swɪn də, Abelə yɪ cígá tíú ɒ m̀è Yɪ yáá con, ɒ nə keni ɒ waa ɒ nə yɪrɪ. Kɪ m̀è nə pɪn, Yɪ ma sèe ɒ jon ɒ jɒŋi wiən tə. Abelə tɪga, yá ɒ nə ken ɒ waa Yɪ nə tə pɪn, ɒ sɒgɒ tə wulə.

⁵ Enokə ken ɒ waa Yɪ nə wuuu. Kɪ m̀è nə pɪn, Yɪ ma tì wá tia yuu, ɒ ja d̀ì ɒ con. Yɪ pɪn Enokə wà twá də tɪan, ɒ ma bà ɒ m̀è Yɪ *sàń. Yá ba yà kúè wàr̀ì wá, ba píí ba nɪ, Yɪ nə tì wá, ɒ kə ɒ con tə yɪrɪ. Yá máŋá tə, Yɪ tə nə wà Enokə tì, ɒ ja d̀ì ɒ sàń nə, ba swɪn ɒ yoo də, ɒ ya liù tə, ɒ nə poli Yɪ pùé. ⁶ Kɪ yɪ liù tə, ɒ nə ken ɒ waa Yɪ cɪcɪ nə wuuu, nə wàá Yɪ pùé ɒ poli. Liù tə, ɒ nə boli Yɪ yɪra, ɒ mɛ, sə ɒ pa cígá də, Yɪ wulə, Yɪ ga yɪ liù tə, ɒ nə pɪn ŋwírán lià tə nə, ba nə p̀ìà wá.

⁷ Nowe ken ɒ waa Yɪ nə wuuu. Kɪ m̀è nə pɪn, Yɪ twá kɪ nə, ɒ ma bɪrɪ wá yìèn, tə nə biàn, tə yà nə ba na yíá wa. Ʈ tì Yɪ sɒgɒ tə, ɒ ma fwa cígá. Ʈ fwa níá yuu bori nɛfarɒ, sə ɒ ma jon ɒ

* **11:4** 11.4 Abelə də Kayen yà yɪ nubɪa. Ba bələ tə mama yà yɪ Adamə də Èvə bɪa. Kayen nə gwa Abelə.

diè lià. Ku yoo təntə, v nə fwa, ku buri də lià†
tə duən tə mama fwa cuna. Yá v dání nə ken v
waa Yui nə tə pin, Yui lwarí wá, ndə liù tə nə, v
nə yi cígá tíú v mù Yui yáá con.

⁸ *Abərahámə ken v waa Yui nə wuuu. Ku mù
nə pin, Yui nə kúrí wá, v sée Yui nii tə. U vəli
lɔɔ don wa, Yui nə kàn nii də, v wá pa wá. Mánjá
tə, v yà ma vəli lá, v yà yèrì bwálí tə, v nə vələ.

⁹ Abərahámə ken v waa Yui nə. Ku mù nə pin,
v va v jèn lɔɔ tə wa, Yui nə kàn nii də, v wá
pa wá. U yin vee ku lɔɔ nii təntə wa bina də
bina. U mù də v bia bələ tə nə yin gansilə tə
wa. Ku mù nə yi *Yizakə də *Zwakəbə. Yui kàn
ku mù nikanı təntə Yizakə də Zwakəbə də con,
ndə Abərahámə nə. ¹⁰ Abərahámə cígá yà dání,
sə tiv tə lwè, sə ku dəkuu də ga ja diàn. Yá Yui
dání nə tún ku tiv tə dəkuu, v mù ga nə lwè ku
də.

¹¹ Sara ken v waa Yui nə wuuu. Ku mù nə pin,
Yui pa, v wání biù v luri. Yá v yà ga yi liù tə, v nə
jigə kazɔɔv, v kúv wàrì biú v luri. Sara yà yèó
yoo nəɔv. U yà yèó də, Yui ba v nikanı yuu wa
zaŋa. ¹² Ku mù nə pin, mánjá tə wa, Abərahámə,
v nə yi bɛɛ nəɔv, nə twi v bwàni, v ni dwíí. Ku
kwa nə, dwíí təntə púlí ndə kacılacɛ nə lanworu
wa. Ba dáá ndə muɔv nii kasıɔv də nə. Ba wàrì
Abərahámə bia tə nii ba gəlì.

¹³ Mə lià təntə mama nə keni ba waa Yui nə
wuuu, ba ga ti, də ba tə wá wiən tə ni, Yui nə
kàn nii, sə v pa ba. Ba mù yi, ba zıgı kwa, ba na
wiən təntə, ba ga fwa pupwən tə yiri. Ba swìn

† **11:7** 11.7 Ku mánjá tə wa, Yui pin dwà nəfarɔv nà, lià tə duən
tə mama ga ti, ba mé ku níá tə wa.

nəpon nəpon də, ba yi vərə, ba nyina tiv ga tëlé tta ka tē yuu wa. ¹⁴ Llà tē nə swìn ku nətə tē, biri nəpon nəpon də, ba pià ba nyina tiv. ¹⁵ Ba yà kùv ba ku tē, ba nə nan ba yá, tē yoo buṇa. Ku fira yà nə jə ba, ba yà tē wàá cwəṇə ba ni, ba pií ba vèli ba sàń təntə wa. ¹⁶ Ku cígá mama yà yi tiv tē nə zien, ku doni won don mama nə, ba yà pià. Ku yi bwálí tē nə wulə Yu sàń nə, nə ba pià. Ku mù nə pɪn, cavira ba Yu jə, sə ba ja wá, ba bon ba nyina Yu. Ku yi cígá, v tətə nə tanɪ tiv, v pa ba.

¹⁷ Abərahame ken v waa Yu nə wuuu. Yá Yu dán yà pià, sə v ja Abərahame dən nə. Yu lòri wá, sə v ti v biú Yizakə, v ma fwa jonji v pa wá. Abərahame dán ma ti v bidva kələn tē, sə v ma fwa jonji, v pa Yu nə. Máná tē, Abərahame fwa ku yoo təntə, də Yu dí yáá, v kàn nii də wá nəε kapuv. ¹⁸ Yu yà swìn Abərahame con, v wú: «Ku wá twá Yizakə, n mù Abərahame n ma na bia». ¹⁹ Abərahame yà yèé də, Yu jə diàn, sə v zìn tɪga tətə tian wa. Ku mù nə pɪn, Yu ma pií v pa wá v biú Yizakə, ndə v nə tɪga, v pií v bwin v nan tian wa.

²⁰ Yizakə ken v waa Yu nə wuuu. Ku mù nə pɪn, v ma lòri Yu, sə v fwa zəni, v pa Zwakobə də Esau† nə, yìèn tē yiri, tē nə biàn.

²¹ Zwakobə ken v waa Yu nə wuuu. Ku mù nə pɪn, máná tē, v tian nə yí, v twɪn Zwuzəfə bia tē duən kwa, v lòri Yu, sə v fwa zəni, v pa ba liù mama nə. Yá v nyí v daduu yuu, v kwá tta, v pa dun Yu nə.

† 11:20 11.20 Zwakobə də Esau yà yi Yizakə bia.

²² Zwɔzefə§ ken v waa Yɪ nə wuuu. Kɔ m̀ nə pɪn, v tɪan mánǎ nə yí, v swìn *Yɪzərayelə lià ka nan *Ezwpətə nagwanaa tə wa yoo. U pɪn ba nii, sə ba lwarɪ nətɔ, ba nə mɛ, sə ba fwa də v kurən tə.

²³ *Moyizə nyɪna-ba ken ba waa Yɪ nə wuuu. Kɔ m̀ nə pɪn, ba nə lɔrɪ wá, ba jɪn wá, ba sègè cànɪ batwa, ba nə nɪ də biú tə zɪən yɪrɪ. Yá fən wà ba jɪn, sə ba cùgù nii tə, Ezwpətə pìú* Farawon tə nə tún. ²⁴ Moyizə ken v waa Yɪ nə wuuu. Kɔ m̀ nə pɪn, v nə twi v jɪ bɛɛ, v vɪga, sə ba bon wá «Ezwpətə pìú Farawon bùá biú». ²⁵ U yá wáá ywání, v dé, v ga fwa pupwən cɔna wa, kɔ nə bá dǎn kɔ ma zwèe. Yá v kúrí v tì, sə v dí càn də Yɪ lià tə. ²⁶ Kɔ yɪ nywarɪ ɲwírán tə, v nə wá na yáá nə v ywàǎá. U nɪ də, v nə dí cavɪra *Kərisə yɪrɪ, kɔ jə jɪjə zənzən. Kɔ nywarɪ tə dwə wiən tə, tə kwənə nə dáá, v nə wá na Ezwpətə nagwanaa tə wa. ²⁷ Moyizə ken v waa Yɪ nə wuuu. Kɔ m̀ nə pɪn, v nan Ezwpətə nagwanaa tə wa. Ezwpətə pìú tə lɪɲa dǎn zàn v yuu, yá fən ga ba wá jə. U jɪn wɔdɪv zənzən, ndə kɔ yɪ v m̀ na Yɪ tə, liú don nə wàrɪ v nɪ. ²⁸ Moyizə ken v waa Yɪ nə. Kɔ m̀ nə pɪn, v dɪ cànà tə, ba nə bonjə *Pakə, dèń. U pɪn, ba kə vǎná jana mimɪə tə nii nə, sə tɪan *malɪka tə dǎn ká bà, kɔ gv Yɪzərayelə lià tə liú mama təntən biú.

§ **11:22** 11.22 Zwɔzefə yɪ Zwakɔbə bɪa fugə bələ tə wa fugə nədɔ nii biú. U nubɪa tə jɪn wá, ba yè baywələ yuu wa, ba ja va Ezwpətə. U dí càn zənzən, yá kɔ kwa nə, v dǎn jɪgə pìú.

* **11:23** 11.23 Ezwpətə pìú Farawon yá pià, v gv bisɪmabari tə mama, Zwifə-ba nə lɔrɪ. Kɔ m̀ nə pɪn, ba sègè Moyizə.

29 Yizərayelə lià tə ken ba waa Yıı nə wuuu. Ku mù nə pın, «mυυ nəstıan» tə níá tə pwèe, ba ga twá ku wa, ba va tia nəkuru yuu, ba nan. Yá Ezwipətə nagwanaa lià tə mù nə pìà, sə ba galu, níá tə púé ba mama yuu nə, ba ga mé lá.

30 Yizərayelə lià tə ken ba waa Yıı nə. Ku mù nə pın, ba kıkarı Zweriko béró naa tə dian barpe, ku ga làn ku tu buuu.

31 Kacwaru don yın lá, ba nə boŋə Rahabə. U də ken u waa Yıı nə wuuu. U mù kan təntə jın Yizərayelə lià tə zəni. Ba lià təntə yà twi, sə ba balı Zweriko tu tə, u mù ga nə jın ba, u sègè. Ku mù nə pın, Yizərayelə lià tə nə gva lià tə, ba nə wà Yıı nii zilí tə, ba yá u mù.

32 Bèèè tətə nə à kúú wá swın? Máná tələ, sə à swın Zwedeyon, də Barakə, də Saməson, də Zwefəte, də *Davidə, də Samıyelə, də Yıı nii *sùsùná tə yoo. 33 Ba mù lià təntə ken ba waa Yıı nə wuuu. Ku mù nə pın, ba ta kúú də payun duən, ba ga dé diàn. Ba fwa yìèn tə də cígá, ba na won tə, Yıı nə kàn nii, sə u pa ba. Ba pın, gərən níó pú. 34 Ba pın, mən tə nə jə kələ kələ dəŋi. Ba gùrí ba jén lià yáá nə, ba nə yà pìà, sə ba gu ba də laguru sián. Ba yà ba diàn jə, yá ba ga píı ba na diàn. Ba yın babıa kúú wá, ba ta vərə tə, ba nə yı ba dıŋa, ba dıŋı. 35 Kana duən yın lá, ba nə ken ba waa Yıı nə wuuu. Ku mù nə pın, ba píı ba na ba lià tə, ba yà nə tıga, də ba bwin ba nan tıga wa.

Yá ba kúú ken càn zənzən lià duən də nə, ba ga vi, sə ba pìà cwəŋə, ba ma jén tə càn tə yáá nə. Ba yà kúrí yozəŋu, tə nə dwə, ba tı. Ku mù

nə yɪ, sə ba pɪí ba bwin ba nan tɪga wa. ³⁶ Ba twɪn ba wa lià duən. Ba mà ba də fɪfuran. Ba vwa ba də banzala, ba kə bən dii wa. ³⁷ Ba dɪlɪ ba wa lià duən də kapana, ba gv. Ba za ba lià duən, ba gwəŋə bələ. Ba gva ba wa lià duən də lagurɪ sɪán. Ba wa lià duən ba dii jə, sə ba pən. Pee də bənɪ tanan nə yɪ ba ganan. Ba ba won mama jə. Lià fwa ba con zənzən, ba pa ba dé càn. ³⁸ Ba yɪ lià tə, ba twá kasɔɔ də pɛɛn yuu wa ba ywaŋa. Pɛɛn kwələn də tɪbunan buran wa nə, ba zwɪ ba pəni. Kɪ cígá wa nə, lià təntə yɪ dun tɪán Yɪ yáá con, ba doni lià tə, ba nə wulə lɔv kɪ tə wa. ³⁹ Ba lià təntə mama ken ba waa Yɪ nə wuuu. Kɪ mù nə pɪn, ba poli Yɪ pùé. Yá də kɪ mù tə mama, ba yíá wà won tə nɪ, Yɪ nə kàn nii də, v wá pa ləzoni nə. ⁴⁰ Cígá, Yɪ yà tanɪ won nəzəŋu kɪ nə dwə, v tún nə nə. U swɪn də, v wá twá duən, v pa kɪ mù won təntə, nə mù də ba mù mɛ nə. Kɪ mù nə pɪn, ba mù lià təntə mama bá yí bwálí tə wa, ba yoo mama nə wá yà zəni, də nə nə twá nə tələ ba wa.

12

Càn nə yí nəba, sə nə tə va yáá wuuu!

(1 Korəntə tɪán 9.24-27; Filipə tɪán 3.11-14; 1 Piyerə 2.21-24)

¹ Fuən lià təntə mama, ba nə ken ba waa Yɪ nə tə, də yɪ ndə nə nə. Yá ba mù dən nə bɪrɪ nəba, nətv nə nə mɛ, sə nə kə nə waa Yɪ nə wuuu. Kɪ mù tə yɪrɪ, nə mɛ, sə nə dɔgv yìèn tə mama, tə nə cì nə nə, tə pa nə wàrɪ yáá nə vɛli, sə nə ga dɔgv cuna tə mama, nə nə wulə tə

wa. Nə dən mə, sə nə dəri nə va, nə yí bwálí tə, Yı nə pìà, sə nə va nə yí, də pínú. ² Nə kənə nə yía Zwezi yuu wa. U mù nə yí liù tə, nə nə twá v nə, nə ma kə nə waa Yı nə wuuu. U mù ga nə wáá v pın, nə vèli nə yí bwálí tə, nə yoo mama nə wá yà zəni. U sèe v pían v pa ba ja wá, ba paa dagarv yuu wa, ba gv. U wà ku jələ ndə cavıra nə, v ga yəə pupoli nii nə, ku nə tégé, ku dənì wá. Sıún nə, v dən jəə Yı jızən* vən nə, Yı pàrì tə wa.

(Apokalisə 3.19; 1 Piyerə 1.6-7, 13-17)

³ Á dənà ká pa á jìàn gwàrì, sə á pìi á kə á kwa. Á buja Zwezi yoo. Cuna là fifın wá zənzən, v ga pían. ⁴ Á wulə á jaŋa, sə á lı á tìàn cuna wa. Yá á liù mama tə wà jaŋa təntə jan, v ti ka wa. ⁵ Ku yı á swèeé də, á nə yı Yı bia tə, Yı kàrì aba naaa? U swìn, v wú:

«À biú, də *Yuu-Tiu nə fıri mú, sə v ma kàrì mú, sə n bún zəni, ku tà tvtv! U nə caga n nii nə, dən ká pa n pùé cùgù! ⁶ Yuu-Tiu yàá fıri liù tə, v nə swə, v kə cwəŋə wa. U yàá fıri là tə mama, v nə yəə də, ba yı v mù bia».

⁷ Á nə dó càn, ku yı Yı pìà, sə ku kwən aba. Ku nətı bıri də, Yı yı v ja aba, v ma fwa v bisíná. Biú wulə, v nyına nə ba wá fıri, sə v ma kə wá cwəŋə wa, naaa? ⁸ Də Yı nə ba liù fıri, ndə v bia tə mama nə, ku bıri də, ku tíú tà v mù tətə bisımaa, v yı liù don biú. ⁹ Nə nyına-ba tia ka tə yuu wa, yàá fıri nəba, nə ga tə zılı ba nii. Ku cígá

* **12:2** 12.2 Ka jəñ pìú jızən vən nə yı dun bwálí.

wa, nə dàń mə, sə nə zìlí nə nyina Yıı nii, υ nə dwə nə nyina-ba tia yuu, nə doni. Də nə nə zìlí υ nii, nə wá na mı tə, kú nə ba zwèe υ con. ¹⁰ Kú yı cígá, nə nyina-ba yáá fıri nəba, mánjá mancın wa, ndə ba pubuŋa nə pìà nətı. Yá nə nyina Yıı mù nə fıri nəba, kú yı, υ ma kwen nəba, sə nə ya là tə, yokukwıun mama nə təlè nə yıra, ndə υ tətə nə, mánjá mama. ¹¹ Mánjá tə wa, ba nə fıri nəba, kú yáá cùgà nə pùé nə. Yá tə mù càn təntə kwa nə, là tə, ba nə píní, ba nan cwəŋə nə, kú yáá pa, ba wàní ba tun tutunzəŋə zənzən, ba ma bıri də, ba yı cígá tìán Yıı yáá con.

¹² Kú mù tə yıri, á mə, sə á pa, á jìàn, tə nə gwàrì, də á nadwana, tə nə ba dıàn jə, pıi tə ja dıàn. ¹³ Á pıan, á nəε tı conjı, tə nə yı mənə mənə. Liù nə wulə á wa ndə gwànú nə, υ dən ká kwen, υ mà υ nəε nə υ dwan, sə υ na yazurə, υ ma va yáá wuu.

Á zıga dıàn, á dənà ká pıi á kə á kwa!

¹⁴ Á fwa kú tə mama, á nə wàá, sə bıcan sıé ya á mù də là tə duən pwərə wa. Á pıan á ya là tə, á nə yá á tìàn míámíán Yıı jìàn wa. Də kú nə tà nətı, á wàrì Yıı á nı. ¹⁵ Á ywàŋá á yuu nə zəni, sə á liù mama dən ká kwìn Yıı pubwanı tə nə. Á kənə dıàn, sə á liù mama dən ká ya ndə tıv nə, kú ŋunan nə cà. Liù nə yı nətı, υ yáá cùgù là tə duən tə mama, υ pa ba də cà.

¹⁶ Á dənà ká pəń duən vεε vεε. Á dənà ká cùgù Yıı cwəŋə tə, á kə durən kú nə! Mə nətı nə Esau fwa. Esau yı *Zwakəbə zıunı. U ma tı υ nəkwıunı tə, υ ma lárı wodıu zıŋa nədu υ nyánú con, υ dé.

17 Á yèé də, ku kwa nə, v kwi yinua, v ma pìà, sə v nyina tə lòrì Yui, sə v fwa zəni v yira. U dān yà pìà, sə v pií v jon v nəkwini tə, v nyánú tə con. Yá v nyina tə viga, v wà sèe.

(Apokalisə 21.2-3; Eberə-ba 2.1-3; 10.26-35)

18 Á mə, sə á lwarı də, á nıbara-ba tə yi ba boli paan yira, ba ma lwarı Yui. Liù yà wáá ku mù paan təntə yira v janı. Mənvoo yà jə paan təntə yuu wa. Ku yuu yà yi yikunu, voo ga fuli lá zənzən. Yá ku dān nə tà nətv á mù con. ¹⁹ Ba nì nabwana kori ku paan təntə yuu wa. Ba nì Yui də sɔgv lá. Ba nə nì sɔgv təntə, fən jin ba. Ba dān lòrì, sə kori tə dān ká pií ku bwé. ²⁰ Yoo tə, Yui yà nə pın ba nii ku yuu wa, yà dwə ba jìàn. Yui swın, v wú: «Liù nə dwen paan tə yira, nə à yèé ku nə yi vanı tətə, ba mə, sə ba dıı ku də kapana, ba gv». ²¹ Tə mù yièn tə ken fən *Moyizə wa, v swın, v wú: «Fən jə nə, à vıvaga».

²² Yá ku tà nətv á mù con. Á mù boli paan tə yira, ba nə boɲə ‹Siyon†›. Mə ku mù paan tə yuu wa nə, Yui tə, v nə wulə mıı wa, tiv tə wulə. Ba boɲə ku tiv təntə *Zwerizalemə. Ku wulə Yui *sàń nə, yá *malıke miliyən dān wulə lá, tə dé cànà. ²³ Á yi á boli Yui təntən bısíná púlí tə yira, v nə púpúnı ba yira sagı wa Yui sàń nə. Á tə yi á boli Yui yira, v nə bürı luv tə mama bürà. Á tə kúv yi á boli lià tə yira, ba nə jigə cígá tián Yui yáá con, ba yoo mama ga ziən. ²⁴ Á twi á yí Zwezi yira, v nə kəni *nimarv nədvən Yui də

† 12:22 12.22 Siyon yi paan tə, Zwerizalemə nə lwə ku yuu wa, yiri nədwan.

ləzoni pwərə wa. U mù nè lwá v jana, v ma sɪn nè cuna. Tə mù jana təntə biri nəba won tə, ku nè zɪən, ku doni won tə, Abelə jana tə nè biri nəba.

²⁵ Á cia á tìàn nè, á dànà ká vɪ, sə á cugv sugv tə, Yɪ tə nè swìn á con. Fuən lià tə vɪga, sə ba cugv v nii tə tia ka tə yuu wa. Yá ku dǎn pɪn, ba yà wàrì càn tə, Yɪ nè wá kə ba nè, yáá nè, ba jén. Yɪ yɪ v nan v sàń, v bà, sə nè cugv v sugv. Nə nè pià, sə nè jén càn təntə jɪn wa, nè dànà ká vəvəri nè kwa, nè ma sá v nii tə. ²⁶ Fuən tə nè, Yɪ sugv tə pɪn tia vuvugu. Síún nè, Yɪ kàn nii v pa nəba də, v bá pa tia cɪcɪ vuvugu. Ku dǎn yɪ tia tə də lanworu tə mɛ nè wá vuvugu. ²⁷ Tə mù sùràn təntə, v nè swìn nətv tə, biri də, wiən tə mama, liù mama nè wàrì v fwa, tə nè wáá tə vuvugə, tə wá vuvugu tə jén. Yá wiən tə mù, tə nè wàrì tə vuvugə, wá yà lá, tə ba jén. ²⁸ Nə dǎn kəni Yɪ lèèèe, v nè pɪn nəba pàrì, ku nè wàrì, ku lwàní tə yɪrɪ. Nə bwɪa v nè, ndə ku nè ywán də wá nətv. Nə zìlé wá, nè ga twá v cwəŋə tə nè zəni. ²⁹ Cígá, nè nyɪna Yɪ tə yɪ ndə mən nè, tə nè dé wuuu.

13

Kwìè bwálí

(Romə tìán 12.10, 13, 15; Matìə 19.4-6; 1 Tesalonikə tìán 4.3-7; 1 Timote 6.6-10)

¹ Á mɛ, sə á sóní á duən *Kərisə lià tə, mǎŋá mama. ² Á dànà ká swèèé vərə nè twi, ba zɪrɪ á yuu wa, sə á ja ba zəni. Lià duən fwa ku nətv,

ba ja *malike zəni, tə nə twi, tə zuri ba yuu wa, ba ga wà lwarı də, ku yi malike nə.

³ Á ywàṅá lià tə yuu, ba nə wulə bān diè wa. Á pian ku ya ndə á mù, də ba mù me yà nə wulə ku bān diè tə wa. Á ywàṅá lià tə yoo, ba nə kəni càn ba nə. Á pian ku yà ndə á mù, də ku tián me, nə ba kəni tə càn tə wa.

⁴ Liù mama me, sə v zili kaswəri. Yá kan də v bari wà me, sə ba tun durən yièn ba kaswəri tə wa. Yu tə wá buri lià tə bura, ba nə pəni duən ve ve. Yu tə wá buri lià tə bura, ba nə cwari.

⁵ Á cia á tián nə. Á dānà ká fin á yía mama, á kə səbiu yuu wa. Á yana pupwən wa, də ku tə, á nə jə. Yu tətə swin, v wú: «À bá yá mú. À bá varì mú, à dugv abada». ⁶ Yu nə swin ku nətv dān pin, nə liù mama jian wāá tə danja, sə v swin, v wú: «Fən ba nə jə, ləzwənə wari nə won, v fwa. Yu nə sanja nə, māṅá mama».

(1 Tesalonikə tián 5.12-13)

⁷ Á lie lià tə yoo, ba nə yin á yáá, ba kə aba Yu cwəṅə tə wa, ba ga swin Yu sugv tə, ba biri aba. Á lie nətv tə, ba nə twá Yu nə, ku ja va, ku yí ba tian. Á kənə á waa Yu nə wuuu, ndə ba nə ken ba waa v nə wuuu, nətv.

⁸ Zwezi-*Kərisə ba lwani mama. U yi won nədv, dián də zən, ku ja velə māṅá də māṅá tə, ku nə ba zwèe. ⁹ Lià duən wulə, ba biri kari nədvra yirə duən. Ku mù tə yiri, á ziga dián, lià təntə dān ká gıgarı aba, ba li Yu cwəṅə tə wa də sūran duən. Ku zien də, Yu pubwanv tə nə pin, nə pubuṅa wulə bwali nədv. Yá ku

dàń nə yɪ conjɪ, tə nə bɪrɪ culən wodirən yuu wa, tə mù ba lià tə, ba nə twá tə culən təntə nə, saŋa. ¹⁰ *Zwifə-ba Yɪ *jonwana tə fwa *jwəŋə Yɪ *wulu gansili jonjɪ kúrí tə yuu wa. Yá nə ja jonjɪ don, Zwifə-ba Yɪ jonwana təntə nə wàrɪ kɪ wa jonjɪ won ba dé. ¹¹ Zwifə-ba Yɪ jonwana yun tián nəkwɪa tə yáá fwa jonjɪ, ɪ pa Yɪ nə. Ʋ yáá ja vána tə, ba nə gva, tə jana, ɪ ja zɪ dəyaa tə wa, kɪ nə yɪ Yɪ cɪcɪ nyiən, sə Yɪ ma wání ɪ sɛɛ, ɪ kwɛn cɪna tə, ba mù də wá pwərə wa. Ba ga yáá ja vána tə mù tə, ba ja nan tɪv tə kasɔɔ nii nə, ba sɪrɪ. ¹² Mə kɪ yɪn nətv də Zwezi. Ʋ yɪ, ba gva wá tɪv tə kasɔɔ nii nə. Ʋ dí càn nətv, ɪ twá ɪ tətə jana tə nə, ɪ ma sɪn ləzoni cɪna, ɪ li. ¹³ Kɪ mù nə pɪn, nə mù dàń naŋa, nə va, nə jérɪ Zwezi, tɪv tə kasɔɔ nii nə, sə ba yala nə mù də ɪ mù mɛ. ¹⁴ Tɪv tɛlə tɪa ka tə yuu wa, nə nə wá yà lá máŋá mama. Kɪ mù yɪrɪ, nə dàń pià tɪv tə, kɪ nə wá bà kɪ jèń. ¹⁵ Nə dàń mɛ, sə nə twá Zwezi nə, nə ma bu Yɪ nə máŋá mama. Kɪ mù bùrà təntə yɪ kɪ naŋa nə níé wa. Yá kɪ dàń yɪ ndə jonjɪ nə, nə fwa nə pɪn Yɪ nə, sə kɪ bu ɪ yɪrɪ nə. ¹⁶ Á dànà ká swèéé, sə á fwa zəni lià yɪra. Á dànà ká swèéé, sə á fwa wɪywan saŋɪ ba yɪra. Kɪ nətv yɪ jonjɪ nə, á fwa, á pɪn Yɪ nə, kɪ nə poli ɪ pùé.

¹⁷ Á zílé á yáá tián nii, sə á mun á tián ba yáá con. Ba mù nə ywàŋá á yun nə, ba ga mɛ, sə ba tún kɪ nii Yɪ con. Də á nə zílí ba nii, ba wá fwa ba tɪtɪŋɪ tə də pupwən. Á nə ba ba nii zílí, ba wá caga á nii nə. Ba ga nə caga á nii nə, kɪ bá san á nə.

Sagı tə yígúré sùràn
(Romə tián 15.30-32; Kolosə tián 1.9-11; 1
Piyerə 5.10-11)

¹⁸ Á lwərə Yıı, á pa nəba. Nə yəé də, nə wà yoo mama cùgò. Máná mama nə swə, sə nə tun won tə, ku nə ziən. ¹⁹ À lòrì aba cígá mama. Á lwərə Yıı, sə v pa nə cwəŋə, sə à pıı à bà á con lala.

²⁰ Yıı nə pın nəba bıcan sié. U pın nə *Yuu-Tiu bwin, v nan tıga wa. U mù Zwezi dàń yı ndə payırv nəfarv nə, v ywàŋá nə yuu, ndə payırv nə ywàŋá pee yuu nətv. U jın v tián, v ma fwa *jonı nə yıı. Ku dàń twá v jana tə nə, v ma kə *nimarv nə mù də Yıı pwərə wa, ku nə ba zwèe.

²¹ Yıı nə wá pa aba dián, máná mama, sə á ma wàní á fwa zəni yiri mama, v nə swə. U mù nə wá twá Zwezi nə, v pa, nə tun ku tə nə ywán də wá. Lìà mɛ, sə ba bv Zwezi-*Kərisə nə, máná də máná, ku nə ba zwèe. Amına! ²² À nubıa-ba, à lòrì aba, sə á zùrì á yıra, á ma cugv sùràn mancın tə tə, à nə púpúnı á nə, sə à ma kwè aba.

²³ Á nəŋə suywáŋú: Ba ı Timote, v nə yı nə nubıu Kərisə yıı, v yà nə wulə bán diè. Á pià, sə à bà, à na aba. Də v nə twi à con fuən, à mù də v mù mɛ dàń wá kə duən, nə bà. ²⁴ Á jùnà á yáá tián tə mama, də Kərisə lià tə mama, á pa nə. Lìà tə, ba də nə yı Kərisə nə tı, ba nə wulə Yitali nə, jùnı aba. ²⁵ Yıı nə wá fwa v pubwanv tə á mama yıra.

Yu soywánó sagı
Nuni, Southern: Yu soywánó sagı New Testament
Le Nouveau Testament en Nun

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 30 Sep 2022 from source
files dated 8 Feb 2022

d18530a7-7259-5f23-92b6-70e3abe5f3fa